

DESCRIPTION DE PICARDIE ET NORMANDIE PROVINCES DE FRANCE.

Picardie Prouince limitrophe de Flandres & Normandie, limire de Picardie, sont terres costoyantes la Mer Oceane. Or Picardie contient plusieurs bonnes Villes bien munies & fortes: qui est vn Pais peuplé de gens couragieux, vaillants, belliqueux & militaires. Le terroir est tresfertile, mesmement de Fourment. En la partie Septentrionale, est situé le Conte de Guines, duquel Calais est la Ville capitale: Ville tresforte, bien munic, & maritime. Laquelle ensemble le Conte de Bouloigne, a long temps porté le ioug Anglois; mais Calais, pour la derniere, fut deliurée de cedit ioug, a l'entrée de l'an mil cinc cent cinquante huit. Car alors le Dudde Guise, Capitaine general de l'armée pour le Roy de France, l'assiega, & la print a force, la restituant ainsi a la Couronne de France. Entre Calais & Doures, est le destroit de la Mer; qui est entre France & Angleterre, des nauieus appellé vulgairement, *de Hoofden*: ou la Mer ne contient en largeur, que trente lieues Angloises. Haute Bouloigne, est ville bien fortifiée de fossez & ramparts; mais la basse distante d'icelle vne lieue vers la Mer, ne fut autre qu'un vilage en l'an 1544. quand les Anglois assiegerent la Haulte Boloigne.

Normandie, ainsi nommée des Nortmans, ou Noruegiens, desquels ceste Prouince fut iadis occupée, est Duché ample & puissant, que le Seine arrouse; Ceste region abonde en poissons, & marée, en bestail & bleds, principalement en arbres fructiers; la multitude desquels est si grande, qu'ilz font des bruuages de pommes & des poires: duquel on en porte vne grande partie aux autres Pais. En somme il y a abondance de toutes choses requises pour la vie humaine, excepté le vin, lequel n'y croist point communement. Plusieurs villes de renom sont en la Duché de Normandie; & entre au territoire de Caux, le fameux port de Mer de Diepe, lequel est vn apport de marchandise, & l'vne desortes places qu'on sache sur la coste Belgique. Les Diepois sont fort enomez sur Mer, a cause des courses, qu'ils font sur l'Ocean, & iusques aux Pais incogneuz du Septentrion, & iusqu'a ce grand voyage de Nord, au midy iusques au Cap de bonne Esperance, & au recourbement de la Mer vers les Indes Orientales. En ceste partie de Normandie est encore assise la grande forteresse & clef du Royaume de France, la Ville dicte Haure de Grace; fondée par le Roy François premier de ce nom, & fortifiée par le Roy Henry second: qui la rendit telle qu'on la voit à present, & y mit bonne & suffisante garnison, comme en ville frontiere. Ceste ville, du temps de Charles ueufiesme, la guerre ciuile étant ouuerte, fut vendue & liurée aux Anglois, par ceux qui s'en disoyent les Seigneurs. Mais la paix faite entre les Seigneurs du Royaume, le Camp fut posé deuant le haure, d'ou les Anglois auoyent desia expulsé les François, & par la diligence des Seigneurs, Monseigneur le Connestable Anne Duc de Mommorancy, & Charles de Cossé Marechal, les Anglois furent si viuement assaillis, qu'a la fin rendirent la place. En ce quartier, le Seine, qui descendant de Bourgoigne, & loing de dela Paris, passant par Paris, se descharge en la Mer Oceane, ou il y a quelque lieu sablonneux; & vn flux de Mer bien admirable, & bien d'autre nature, que celle des autres fleuues, qui tombent en la Mer Occidentale. Car le flot de la Mer monte subitement, & tout a coup, faisant vn bruit horrible, à la hauteur d'vne pique longue, ou plus. Qui cause que plusieurs nauires, y étant enuolées par la negligentie des nauieus, se trouuent en grand danger de naufrage. Les habitans le long de la riuere, oyants le bruit du flot de Mer, crient la bare, la bare: ce qu'entendans leurs voisins, crient du mesme, donnans ainsi l'un l'autre le long du fleuue, aduertissement de ce flux de mer. Sur ceste riuere sont assises plusieurs Villes magnifiques & belles, desquelles Rouen & Paris sont les principales.

Rouen Ville capitale de Normandie, est d'assiete fort plaisante, ayant vers midy la fameuse riuere de Seiuue. A l'entour de ceste ville on voit plusieurs belles, fertiles campagnes, qui rendent le plant de ceste ville plus agreable. Quant à la marchandise. Paise de la riuere, & le canal d'icelle, capable de grands nauires, chargez de toute sorte de marchandise, & le voisinage de la mer, la tellement rendue abondante a Rouen, qu'elle peut estre tenue, pour l'vne des principales villes marchandes de l'Europe, & plus hantée des marchans; ou les citoyens s'ot fort experimentez au trafic, tant par mer, que par terre.

Paris est ville fort grande, ample & bien peuplée: & contient plus d'habitans, que les trois melieures villes de Brabant. Elle est ville, la plus florissante de l'Europe, Court Royal ordinaire, & grand Parlement de France. Paris peut estre, non sans raison appellée Roine entre beaucoup de villes a elle subiectes, voire vn petit monde: en laquelle l'Isle de Nostre Dame, que fait le Seine, fut iadis le premier plant de ceste ville, ou ores est basty au bord du fleuue le Palais Royal laquelle par succession de temps a esté augmentée & bastie de la maniere qu'on la voit à present. Entre autres choses dignes de memoire, sont en Paris cincq ponts, bastis sur la grande riuere le Seine, par lesquels on passe en l'Isle de Paris; desquelz celui de Nostre Dame, est le plus magnifique; qui contient en longueur presque septante vn pas, & dixhuit en largueur: lequel est fait de pierre, les piliers duquel sont fondez sur des pilotis. Sur ce pont sont bastis soixante huit maisons belles & superbes, de sorte que ce pont est vn chef-d'œuvre, & vne des plus belles pieces d'Europe. Aussi sont les autres ponts, des deux costez ornez de beaux & superbes edifices, de sorte qu'on les cuideroit, non ponts, ains belles rues. D'auantage sont en ceste ville cincq cent rues, ayants leur propres noms, & en icelles telle frequence de peuple, qu'a grand peine on y passe aysement. Plus y ail si grande quantité de toute sorte de marchandise, qu'on ne scauroit demander chose, qui n'y soit à vendre. En outre est a Paris la tresfameuse & magnifique Vniuersite, qui n'a seconde en tout l'vniuers, fondée par l'Empereur Charles le grand, a ce induit par vn excellent personnage nommé Alcuin. Ceste Vniuersite a esté depuis dotée par plusieurs Roys de grand Priuileges & immunitéz, & illustrée de 55. Colleges: desquelz sont les principaulx, les Colleges de Sorbonne, Nauarre, Montagu, &c. Parquoy à bon droit Paris peut estre nommée Court Royal, Vniuersite, & Ville marchande.